

आकाशवाणी

खबरां

- रक्षा मंत्री राजनाथ सिंह होरें आखेआ जे सरकार रक्षा खेत्तर च आत्मनिर्भरता गी यकीनी बनाने आस्तै लगातार कम्म करा'रदी ऐ।
- उत्तर प्रदेश, उत्तराखंड, हिमाचल प्रदेश, हरियाणा, राजस्थान ते दिल्ली दे मुखमंत्रियें यमुना नदी दे पुर्नविकास आस्तै किशाऊ मल्टीपपर्ज डैम प्रोजेक्ट सरबन्धी समझौते पर कीते दस्तखत।
- भारत टिकाऊ विकास दे हिस्से दे रूपै च सर्कुलर इकानमी गी बढ़ावा देने आस्तै प्रतिबद्ध, आखेआ पर्यावरण मंत्री भूपेंद्र सिंह होरें।
- प्रधानमंत्री नरेंद्र मोदी होरें इंजीनियरें गी राष्ट्र निर्माण दा कर्मयोगी करार दित्ता।
- अमरीकी अदालत नै विदेशी विद्यार्थियें ते पत्रकारें आस्तै ट्रम्प प्रशासन दे नमें बीजा नियमें पर रोक लाई।
- मौसम मैहकमे नै अज्ज पंजाब, दिल्ली, कच्छ, तमिलनाडू, असम ते मेघालय च भारी बरखा दी भविष्यवाणी कीती।
- मर्दे दे क्रिकेट च भारत अज्ज दिल्ली च दुए टी-20 अंतरराष्ट्री मैच च अफगानिस्तान कन्नै खेडग।

<><><><><><>

Rajnath Defence

रक्षा मंत्री राजनाथ सिंह होरें आखेआ जे रक्षा क्षेत्र च भारत गी आयात उप्पर निर्भर नेई रौहना पवै, इस आस्तै केई उपा-5 कीते जा'रदे न ते देसै गी आत्मनिर्भर बनाने आहली बक्खी अगगे बधाया जा'रदा

ऐ। उनें आखेआ जे रक्षा क्षेत्र च आत्मनिर्भरता, रक्षाबलें, अनुसंधान ते विकास संस्थानें ते उद्योग जगत बशकार सहयोग कन्नै हासल कीती जाई सकदी ऐ। उनें तकनीक गी तेजी कन्नै अपनाने ते भारतदे राा विनिर्माण पारिस्थितिकी तंत्र गी मजबूत करने लेई संवाद, सह विकास ते सह उत्पादन उप्पर जोर दित्ता। नमीं दिल्ली च डी.आर.डी.ओ उद्योग तालमेल सम्मेलन विमर्श 2026 गी संबोधित करदे होई श्री सिंह होरें आखेआ जे डीआरडीओ नै मिसाइलें थमां लेइयै रडार, लड़ाकू विमान थमां लेइयै पनडुबियां ते इलेक्ट्रानिक वारफेयर सिस्टम थमां लेइयै आर्टिफिशल इंटेलीजेंस तगर हर खेत्तर च अपनी समर्थता दा प्रदर्शन कीता ऐ। रक्षा मंत्री होरें आखेआ जे पिछले किश बरें दरान रक्षा खेत्तर च होए दे सुधार अभूतपूर्व न ते इस दरान केई बदलावकारी फैसले बी लैते गे।

<><><><><><>

Kishav Multipurpose

उत्तर प्रदेश, उत्तराखंड, हिमाचल प्रदेश, हरियाणा, राजस्थान ते दिल्ली दे मुख्मंत्रियें अज्ज यमुना नदी दे पुर्नविकास लेई किशाऊ मल्टीपपर्ज डैम प्रोजेक्ट सरबन्धी समझौते पर दस्तखत कीते। एह समझौता नमीं दिल्ली च केंद्री गृह मंत्री अमित शाह हुं'दी मौजूदगी च कीता गेआ। इस मौके पर केंद्री जल शक्ति मंत्री सी.आर. पाटिल, केंद्री गृह सचिव, जल संसाधन विभाग दे केंद्री सचिव ते सरबन्धत राज्यें दे मुख्म सचिव बी मौजूद हे। इस थमां पैहले इस बरे च केंद्री गृह मंत्री अमित शाह होरें इस मुद्दे पर जून म्हीने च इनें राज्यें दे मुख्मंत्रियें कन्नै बैठक दी अध्यक्षता कीती ही। बैठक दरान एह फैसला लैता गेआ हा जे किशाऊ मल्टीपपर्ज डैम प्रोजेक्ट दे पानी कन्नै सरबन्धत घटक दी लागत दा 90 फीसदी हिस्सा केंद्र सरकार केंद्री सहायता दे रूपै च देगा।

<><><><><><>

VP-BRICS

उपराष्ट्रपति सी.पी राधाकृष्णन होरें अज्ज आखेआ जे टाकरें ते बरोधाभासें कन्नै घिरी दी दुनिया च नमीं दिल्ली च सफलतापूर्वक होए दा ब्रिक्स शिखर सम्मेलन बड़ी बड़ी ते महत्वपूर्ण उपलब्धि ऐ। राश्ट्री राजधानी च भारती विश्व मामलें दी परिषद गी राश्ट्री महत्व दी संस्था दे रूपै च मनाए जा'रदे रजत जयंती समारोह गी संबोधित करदे होई उनें सर्वसम्मति कन्नै अपनाई गेदी नमीं दिल्ली घोशणा गी बड़ी उपलब्धि करार दित्ता। इस मौके पर विदेश मंत्री डा. एस जयशंकर होरें आखेआ जे भारत वैश्विक चुनौतियें, खास करियै ग्लोबल साउथ कन्नै जुड़े दे मुद्दे पर अपने दृष्टिकोण गी होर आत्मविश्वास कन्नै दुनिया दे सामने रक्खा करदा ऐ।

<><><><><><>

MEA-Briefing

विदेश मंत्रालय नै आखेआ ऐ जे नमीं दिल्ली च होए दे 18में ब्रिक्स शिखर सम्मेलन दे मौके प्रधानमंत्री नरेंद्र मोदी ते चीनी राष्ट्रपति शी जिनपिंग बश्कार होई दी बैठक दरान केई मुद्दे पर चर्चा होई। नमीं दिल्ली च साप्ताहिक मीटिंग ब्रीफिंग दरान विदेश मंत्रालय दे प्रवक्ता रणधीर जायसवाल होरें आखेआ जे बैठक दरान प्रधानमंत्री नरेंद्र मोदी होरें भारत दी चैताएं गी सामने रक्खेआ ते जोर दित्ता जे दौनें पक्षें गी इक दुए कन्नै संवेदनशील रवैया रखना चाइदा ऐ।

<><><><><><>

BJP WB Candidate

भारती जनता पार्टी नै पच्छिम बंगाल च विधानसभा दी अगले होने आहले चुनाएं लेई अपने मेदवारें दे नाएं दा ऐलान करी दित्ता ऐ। पार्टी नै रेजीनगर विधानसभा सीट थमां सखारव सरकार गी अपना मेदवार बनाया ऐ जिल्ले के नंदीग्राम विधानसभा सीट थमां हसिरानी रथ पार्टी दे मेदवार होइन।

<><><><><><>

MOEFCC Economy Forum

पर्यावरण, जंगलात ते जलवायु बदलाव सरबंधी मंत्री भूपेंद्र यादव होरें आखेआ जे भारत अपने टिकाऊ विकास दे ढांचे च सर्कुलर इकानमी दे सिद्धांतें गी शामिल करने आस्तै प्रतिबद्ध ऐ। मंत्री होरें जोर देइयै आखेआ जे प्रधानमंत्री नरेंद्र मोदी हुं'दी अगुवाई च भारत नै संरक्षण दे अपने संस्कृतिक मूल्यें पर आधारित प्राचीन प्रथाएं गी आधुनिक नीतियें च तब्दील कीता ऐ। गुजरात दे गांधीनगर च महात्मा मंदर च अजज विश्व सर्कुलर इकानमी फोरम-2026 दे 10में संस्करण दे उद्घाटन सत्र गी संबोधित करदे होई मंत्री होरें आखेआ जे एक्सटेंडेड प्रोज्यूसर रिस्पॉसिबिलिटी रेगुलेशन ते मिशन लाइफ जनेहू प्रयास सर्कुलर इकानमी दी दिशा च भारत दी जात्तरा दे महत्वपूर्ण कदम न।

<><><><><><>

National Engineer's Day

अज्ज नेशनल इंजीनियर्स डे मनाया जा'रदा ऐ। प्रधानमंत्री नरेंद्र मोदी होरें अपना इक वीडियो सांझा करदे होई देसै दी तरक्की च इंजीनियरें दी भूमिका गी उजागर कीता। उनें आखेआ जे इंजीनियर बिचारें ते आकांक्षाएं गी ठोस उपलबिधयें च बदलने दा कम्म करदे न। प्रधानमंत्री होरें इंजीनियरें गी देसै दी प्रगति आस्तै कम्म करने आहले कर्मयोगी करार दित्ता। एम. विश्वेश्वरैया होरें इंजीनियरिंग दे खेत्तर च अपने अग्रणी योगदानें लेई जाने जंदे न। अपने नमें डिजाइन, दूरदर्शी योजना ते समाधानें दे जरियै उनें देसै दे बुनियादी ढांचे गी बदलने च महत्वपूर्ण योगदान दित्ता।

<><><><><><>

SC Retiring Officers

सुप्रीम कोर्ट नै अज्ज सरकार गी आखेआ ऐ जे जिसलै तगर नमीं नियुक्तियां नेई होई जंदियां, उसलै तगर अर्ध न्यायिक संस्थाएं दे सेवामुक्त होने आहले अध्यक्षें ते सदस्यें दा कार्जकाल इक म्हीने जां जिसलै तगर नमीं नियुक्तियां नेई होई जंदियां उसलै तगर बधाया जा। हालांकि मुख् न्याधीश सूर्यकांत ते न्यायमूर्ति जायमाला बागची ते वी. मोहना दी पीठ दे सामने अटार्नी जनरल आर.

वेंकटरमणी होरें केंद्र सरकार आसेआ दलील दिती ऐ जे नमीं नियुक्तियें दी प्रक्रिया शुरू करी दिती गई ऐ।

<><><><><><>

Doordarshan 67 Years

भारत दा सार्वजनिक सेवा प्रसारक दूरदर्शन अज्ज अपना 67मां स्थापना दिवस मना'रदा ऐ। सार्वजनिक सेवा प्रसारक दूरदर्शन दी शुरूआत 1959 च आकाशवाणी दे तैहत इक प्रायोगिक टेलीविजन सेवा दे रूपै च होई ही। समें दे कन्नै दूरदर्शन सूचना दे प्रसार, सांस्कृतिक विरासत दे संरक्षण ते राश्ट्री एकता गी मजबूत करने आहले इक महत्वपूर्ण मंच दे रूप च विकसित होआ ऐ। सेटलाइट ते डायरेक्ट टू होम सेवा दे जरिये दूरदर्शन देसै दी तकरीबन 100 फीसदी आबादी तगर अपनी पंछान बनाई चुके दा ऐ।

<><><><><><>

Trump-Journalists

अमरीका दी इक संघीय अदालत नै ट्रंप प्रशासन आस्सेआ विदेशी विद्यार्थिं ते पत्रकारें दे रौहने दी अवधि बारै तैय कीती गेदी सख्त सीमाएं पर आरजी तौर उप्पर रोक लाई दिती ऐ। अदालतै आखेआ ऐ जे इस नीति गी लागू करने कन्नै अमरीकी अर्थव्यवस्था ते उच्च शिक्षा प्रणाली गी बड़ा मता नुकसान होई सकदा ऐ। ट्रंप प्रशासन नै इस बारे जुलाई म्हीने इस नियम गी मुकदा रूप दित्ता हा। एहदे च विदेशी विद्यार्थिं ते एक्सचेंज विजिटर्स लेई बीजा लेई चौं बरें दी सीमा दा प्रस्ताव रक्खेआ गेआ हा, जिसलै कि पत्रकारें गी बद्धोबद्ध 240 दिनें तगर रौहने दी इजाजत दिती गई ही। उआं चीन दे पत्रकारें लेई 90 दिनें दी सीमा तैह कीती गई ही। हून परानी नीति दे तैहत विद्यार्थी ते पत्रकार अपने प्रवास गी बधाने लेई आवेदन करी सकदे न।

<><><><><><>

CM Defence Report

रक्षा मंत्रालय दी सलाना रिपोर्ट च उत्तरी इलाकें दी सुरक्षा स्थिति गी उजागर कीता गेआ ऐ। मुखमंत्री उमर अबदुल्ला होरें आखेआ जे एल.ओ.सी ते एल.ए.सी पर तनाऽ गी घट्ट करने आहली कुसै बी गैऽ दा सोआगत ऐ, खास करी उनें लोकें आसेआ जेड़े उस इलाकें च रौहंदे ना। एहू गल्ल मुखमंत्री होरें एलएसी पर चीन आसेआ बलें दी तैनाती घट्ट करने बारै रिपोर्ट च दस्सी गेदी गल्लें पर आई ऐ। रिपोर्ट च जम्मू-कश्मीर च पाकिस्तान प्रायोजित आतंकवाद आहली चुनौती बारै बी उजागर कीता गेआ ऐ। एह्दे मूजब 2025 च 19 आतंकवादिएं दा सफाया कीता गेआ जेदे च 8 पाकिस्तानी आतंकवादी हे। एल.ओ.सी पर घुसपैठ दी 6 कोशशें गी नाकाम बनाया गेआ ते 12 पाकिस्तानी घुसपैठिए दा सफाया कीता गेआ। छड़ा इक मुकामी युवा आतंकवाद च शामिल होआ। एहू सारा किश आतंकवाद च मुकामी युवाएं दी घट्ट हुंदी शमूलियत गी दर्शादा ऐ।

<><><><><><>

Route Permits-Udhampur (Byte)

ग्रामीण इलाके च सार्वजनिक यातायात दी कमी गी पूरा करने लेई क्षेत्रीय यातायात प्राधीकरण उधमपुर नै 26 नमें Route Permit जारी कीते ना। इंदे च 2 बसां, 16 मिनी Buses ते 8 Magic Vehicle शामिल ना। एहू फैसला हाल च क्षेत्रीय यातायात सरबंधी प्राधीकरण डिप्टी कमीशन उधमपुर हुंदी अध्यक्षता च होई दी बैठक च लैता गेआ।

<><><><><><>

Weather

मौसम विभाग नै अज्ज हरियाणा, पंजाब, तमिलनाडु, दिल्ली, कच्छ, दक्खनी अंदरूनी कर्नाटक, पुद्दुचेरी, केरल, पच्छिम बंगाल दे तराई इलाके, सिक्किम, असम, अरूणाचल प्रदेश ते मेघालय च भारी बरखा दी पेशगोई कीती ऐ। अगले द'ऊ शा त्र'ऊ दिनें दौरान अंडमान ते निकोबार द्वीप समूह,

बिहार, जम्मू-कश्मीर ते लद्दाख, झारखंड, ओडिशा ते राजस्थान च अंधी-झकख, बिजली कड़कने ते तेज ब्हाएं दी संभावना ऐ। आंध्र प्रदेश, छत्तीसगढ़, गुजरात, लक्षद्वीप, मध्य प्रदेश, नागालैंड, मणिपुर, मिजोरम, त्रिपुरा, तेलंगाना, उत्तर प्रदेश ते उत्तराखंड च बी इसै चाल्ली दे हालात वीरवारें तक्कर जारी रौहने दी मेद ऐ।

<><><><><><>

Weather-JK

जम्मू-कश्मीर च 17 सितंबर तगर मती सारी थाहें पर बरखा ते अंधी झकखड़ झुल्लने दी भविक्खवाणी कीती गेई ऐ। खासतौर पर बडुलै सवेला ते दपैहरी मगरा मौसम विभाग नै किश थाहरें पर अंधी झकखड़ झुल्लने, बिजली चमकने ते धूल आहली अंधी चलने दी पेशनगोई कीती ऐ। प्रदेश च 18 थमां 25 सितंबर बश्कार मौसम आमतौरा पर खुश्क रौहग पर किश थाहें बरखा पेई सकदी ऐ। मौसम विभाग नै करसानें खास करी सेअऊ ते मूंजी दी खेती कन्नै जुडे दे लोकें ते होरनें दुई राई-बाई गतिविधिएं आस्तै परामर्श जारी कीता ते पूरी एहतियात बरतने लेई आखेआ ऐ।

<><><><><><>

Men's Cricket

भारत ते अफगानिस्तान बश्कार ट्वेंटी-ट्वेंटी क्रिकेट श्रृंखला दा दूआ मैच अज्ज दिल्ली दे अरुण जेटली स्टेडियम च खेड्डेआ जाग। एह मैच संजा साड्डे 7 बजे शुरु होग। ऐतवारें पैहले मैच च भारत नै 7एं विकटें कन्नै जित्त हासल कीती ही। भारत इस श्रृंखला च 1-0 कन्नै अगगे ऐ। त्रीया मैच बी वीरवारें दिल्ली च होग।

<><><><><><>